

四庫全書

集部

欽定四庫全書

集部

聖祖仁皇帝御製文集卷二十八

二至

臣永瑤恭校

侍讀臣孫球覆勘

覆校官中書臣施光輅

校對官助教臣胡子襄

膳錄貢生臣苗序洙

膳錄貢生臣吳紹昆

欽定四庫全書

聖祖仁皇帝御製文集卷二十二目錄

碑

聖感寺碑

賜一等公遏必隆家廟碑

黑龍潭重建龍王廟碑

賜廣西巡撫馬雄鎮墓碑

賜福建總督范承謨墓碑

中臺演教寺碑

東臺望海寺碑

欽定四庫全書

聖祖仁皇帝御製文集卷二十二

碑

聖感寺碑

夫以北極神京西山勝地峰巒迴互草木龍蔥晴嵐霽雪掩映皇居秋水春華邀迎翠輦非徒百工職事瞻仰於斯實亦九州風土形勢所在其間招提梵宇極雕梁巨麗之奇精舍珠林盡繡栴紆迴之巧然松雲燈火不

聞禪誦之聲泉石荒苔難覓經行之蹟故雖危覺聳漢  
上接雲霄而紺殿凝塵空頽歲月朕每遊歷其處輒為  
致慨於衷平坡寺者僻處西南遙臨宮闕刻盤螭於玉  
砌丹碧流金塑寶像於琳宮輝煌映藻采繡網戶饑鴿  
時馴鈴鐸鳴檐野狐知肅迨時移物換雨圯風侵華榱  
作燹已無往日之弘觀畫壁成泥誰識當年之璀璨寺  
僧海岫篤實持躬勤勞砥行簞瓢布衲林中不演三車  
瓦鉢芒屨宵次時虔五戒十載經營重新殿廡六時功

課繼廣門庭遂使清宵梵唄蕭疎盡入寒空向曉鐘聲  
颯沓仍隨秋雨浮屠之傳於斯無媿朕萬幾有暇七校  
偶過省耕省歛時駐蹕於茲山一豫一遊再撫臨於其  
地詢知本末感

佛慧之重光鑒彼勤劬啓聖功於匪懈更名聖感特賜  
宸書欲使遐邇具瞻臣民共識豈若崇祀作佞開愚眚  
奔走之端惟曰致敬而遠法往聖格思之道勒諸貞珉  
垂感會於千秋記注瑤編志心期於一日臣工上下咸

悉朕懷

賜一等公遏必隆家廟碑

孝昭皇后壺德攸宣倫情肫篤念父母鞠育之勤思祠  
宇春秋之祀朕嘉其意遣官督理後二月皇后已崩十  
七年十二月工作告成因諭內閣詳考明代實錄允符  
典例特賜碑文勒諸貞石粵稽往代臨御萬邦必敦九  
族宮闈化洽內輔惟賢眷祐之隆宜崇曠典以篤椒親  
道至備也孝昭皇后仁孝性成溫恭德著久存此牀之



思每深霜露之感尔一等公過必隆同妻縣主敬慎齊  
家洽謙冲之令望肅雍秉訓誕淑慎之坤儀是當錫以  
丹璽享以蘋蘩爰命冬官董其興作事方行乎二月哀  
忽動於六宮未遂之志朕甚悼焉念尔勲戚大臣兼核  
歷朝典制落成之日用賜豐碑昭國家不遺故舊之恩  
示皇后永懷顧復之念光流泉壤堪為戚屬之羽儀名  
列丹青不愧綸言之獎賚凡尔子孫克保無斁欽哉

黑龍潭重建龍王廟碑

傳曰神有功德於民則祀之能捍大患禦大災則祀之  
非此族也不載祀典朕自御極以來夙興夜寐惟思稼  
穡為小民之依所期時和歲豐嘉生樂育然年穀順成  
雨澤是資詩曰琴瑟擊鼓以祈甘雨信乎

天心仁愛亭毒萬物而協靈効順優渥霑足之應皆有  
神焉以司之亦如分猷布澤之無敢曠厥職焉距京師  
西三十餘里金山之麓有潭泓然以深不泛不涸前代  
時以亢旱禱望其地輒能興致靈雨因名黑龍潭焉潭

之側倚山瞰壑舊有祠宇以祀其神朕數以祈雨駐蹕  
於茲爰謀式廓其廟貌以昭靈貺而敬民事今者四郊  
之內雨暘時若歲登大稔工適告成惟神之功德實能  
膏澤田疇以福庇生民揆諸捍患禦災之義莫大於此  
用是勒諸貞石垂示無窮寧不偉歟

賜廣西巡撫馬雄鎮墓碑

朕惟臣子之誼大節為重然平居無事之時人人侈談  
忠義一旦臨事而為國捐軀確乎不奪者蓋寡則所稱

成仁取義之士國家得之宜何如褒崇焉爾馬雄鎮洊  
歷禁近簡授節旄恪共之譽有聞綏輯之功斯著豈意  
叛藩逆命怙惡弄兵急變起蕭牆之中孤城介桂嶺之  
外聲阻援絕形絀勢危爾則以死自持抗詞罵賊遂觸  
兇怒橫致幽囚然猶志切輸忠力圖滅寇間關遣子萬  
里來歸慷慨上書一心罔貳丹誠旣通於王室闔門咸  
殉於巖疆節挺冰霜歷四年而益厲操堅金石經百折  
而不撓可云烈矣嗚呼惟見危乃知授命之不易疾風

勁草繫尔一身實荷綱常之鉅朝廷養士數十年有臣  
如此庶無負焉朕用旣憫且嘉特考彞憲賜謚文毅躋  
以崇階爰勒貞珉昭示來世凡屬臣僚聞風興起咸思  
自勵尔之為功世道豈淺歟康熙二十一年正月二十  
六日

賜福建總督范承謨墓碑

朕惟朝廷簡畀重臣授以封疆之任平時則竭誠殫力  
以靖厥職猝逢事變則有凜乎不可犯確然不可奪之

節舍生取義流光天壤古所謂不二心之臣如此而已  
尔范承謨名臣之子奮迹甲科入侍禁林出典節鉞咸  
有聲績著於當官洎閩疆蒞鎮之年值狂豎盜兵之日  
寇起門庭禍生肘腋智未及施勇不暇展而尔志恥倖  
生義無苟免奮身罵賊誓不共天遂致閹室幽囚三年  
拘繫阻攸其衣食迫脅以甲兵兇燄彌張貞操愈勁卒  
蹈白刃以作完人慷慨從容兼有其美茲者底定疆陲  
申明命討罪人斯得臣節益昭倍深軫悼之情特厚飾

終之禮寵以隆秩謚曰忠貞嗚呼褒忠顯善帝王治世  
之大權恩命疊頒朕曷有私於尔以培正氣以植人倫  
庶使選悞之士覩盛典而知興慕義之夫聞休風而加  
勸勒諸貞石其永有譽於無窮哉康熙二十一年四月  
二十六日

中臺演教寺碑

五臺之山高出雲代然不與岳鎮之列山經禹貢以及  
道書所稱洞天福地均莫之載蓋自昔為釋子所棲故

與峨嵋普陀號三靈山之三山者或在海上或當巴蜀險遠之區惟茲山峙神京之右千里而近宜登陟者較多焉朕嘗覽觀載記謂茲山東有離岳火珠西有麗農瑤室南有洞光珠樹北有玉澗瓊枝中峰則有自明之金環光之壁是靈秀所鍾中臺為尤異矣臺高三十有九里游者至是必思憩息之地此自唐以來演教寺之所由建也山峻多風寺久傾圯朕爰命工拓而新之譬諸於物澤雉十步一啄百步一飲鵬之飛九萬里而扶



搖六月而息其遠邇高下雖殊方其息自適之情則一也朕之命新茲寺亦欲登是山者咸有自適之樂焉爾

東臺望海寺碑

周官職方氏掌天下之圖辨九州之國州表一山以為鎮躋其巔可以望海者則揚之會稽兗之岱青之沂幽之醫無閭凡四山焉惟岱距海較遠登日觀望扶桑其岩堯峻極尤非他山可比也五臺隸并州州境無海而臺之東峰以望海名蓋雲中上黨晉地踞天下之脊山

之麓旣高而臺之高復三十餘里龍泉以東岡巒陵阜  
皆處其下遠瞰滄瀛諸州景光愴恍儼若紫淵浩淼與  
青顥之氣混涵相接記稱旭日方升望大海若陂澤信  
有以哉臺有寺棧棟桎桷不蔽風雨朕省方登此命加  
修葺復其初制蓮臺法相固極莊嚴已四方之人得於  
焉信宿縱睇溟渤之朝暾以視夫岱宗日觀又何多讓  
耶遂礮片石文以紀之

聖祖仁皇帝御製文集卷二十二

欽定四庫全書

聖祖仁皇帝御製文集卷二十三目錄

碑

南臺普濟寺碑

西臺法雷寺碑

北臺靈應寺碑

賜江南江西總督于成龍墓碑

至聖先師孔子廟碑

孟子廟碑

欽定四庫全書

聖祖仁皇帝御製文集卷二十三

碑

南臺普濟寺碑

南臺世傳文殊示現之處也臺當山之陽地稍暄暖金  
葉日菊佛鉢之花生徧崖谷若錦繡之相錯故其峰曰  
錦繡之峰峰有寺曰普濟蓋宋所建云佛氏之教息心  
淨業以獨善其身而文殊所願在饒益衆生布施以廣

仁義持戒以守信忍辱以為謙精進以施敬禪定以守  
靜智慧以通理其慈惠之心有獨弘者自漢以來清涼  
之山代有精舍至宋之十寺為國祝釐恒賜詔褒答載  
籍傳之所從來久矣山之僧棲巖飲澗以自甘惟守其  
師之說以獨善其身寺有圯者力不能興葺也朕登南  
臺乃命復新普濟寺以居僧徒之息心淨業者俾祝釐  
於是登臨者覩象教之精嚴慈惠之心可以油然而生  
矣

西臺法雷寺碑

朕聞鷲嶺蜂臺不少水晶之域鵲林鹿苑恒開金粟之園莫不獻露裛之千花陰春浮之雙樹迺有龍湫抱鉢偕猿鶴以高栖燕子成龕捫藤蘿而直上況夫竺法蘭之初地舊是花宮勾龍爽之畫圖羣推紫府紺蓮照野智炬長炎青豆開房精廬用結西臺絕頂有法雷寺焉方廣化城文殊密宇琉璃布地霄鄰挂月之峰栲栳名山磴轉千雲之石僊人五百青髻曾遊沙界三千玉毫

盡撒指修蛇之負壑恒嶽匪遙數歸雁之銜蘆并門在  
下朕對清涼之勝景招閭闔之長風北瞻則畢月昴車  
西顧則參旗井鉞憫此伽藍久廢飭其飢甌重新紺馬  
銖衣長轉相輪於雲表桐魚茶版仍流清響於山椒庶  
使龍象行時金閣遠符大厯狻猊坐處神光復現元和  
云爾

北臺靈應寺碑

清涼山左鄰恒嶽右接天池環基五百餘里五峰竦峙



而北臺為最高歲癸亥二月朕鑾輅西巡登其層巘雲  
氣生鳥履之下開合萬變時春雪方霽青霄夙絕天風  
颯然所謂身歷清靜之域目睇澄鮮之境心遊太古之  
地盈縮造化吐納顥氣冷然善也臺名叶斗峰舊有靈  
應寺丹青虧剝禱廟敬傾朕念衣緇之流不外仁義以  
為教故熙隆之代亦所不廢矧曼殊化宇恒著感通遠  
邇之人蘄嚮久矣爰命崇其陞祀飾其題案土木瓦石  
丹堊金碧之需財自內出不涉經費工以傭給役弗違

農是以工敏於事而民若不知秋八月告落成焉董事之臣請製文勒石以志之用以上昭景福於慈闈下廣嘉惠於兆庶垂示於億萬斯年爾

賜江南江西總督于成龍墓碑

朕讀周官六計獎吏曰廉善廉能廉敬廉正廉法廉辨吏道厥惟廉重哉朕用是審觀臣僚有真能廉者則委以重寄錫以殊恩所以示人臣之標準也尔于成龍秉心樸直蒞事忠勤而考其生平廉為尤著以故累加特

擢皆朕親裁蓋拔自庶官之中游授節鉞之任尔能堅  
守夙操無間初終古人脫粟布被或者嫌於矯偽尔所  
謂廉本於至誠聞尔之風可以興起乃不憊遺忽焉奄  
逝日者省方察吏南及江表采風謠於草野見道路之  
謳思清德在人於今不泯惟尔之廉天下所知朕俯合  
輿情載褒勁節旣考名副實謚曰清端葬祭以禮又晉  
之崇秩賜予有加恩卹尔子嗚呼人臣行已服官事主  
之道尔可謂有始有卒者矣顧不可以風世也歟

至聖先師孔子廟碑

朕惟道原於天弘之者聖自庖犧氏觀圖畫象闡乾坤之祕堯舜理析危微厥中允執禹親受其傳湯與文武周公通承其統靡不奉若天道建極綏猷負乎尚矣孔子生周之季韋布以老非若伏羲堯舜之聖焉而帝禹湯文武之聖焉而王周公之聖焉而相也歸然以師道作則與及門賢喆紹明絕業教思所及陶成萬世伏羲堯舜禹湯文武周公之統惟孔子繼續而光大之矣間

嘗誦習詩書之所刪述大易之所演繫春秋之所筆削  
禮樂之所修明本末一貫根柢萬有殆與覆載合其德  
日月並其明四時寒暑協其序焉故曰仲尼之道一天  
道也朕敬法至聖景仰宮牆嚮往之誠弗釋寤寐歲甲  
子十有一月時邁東魯躬詣曲阜展修祀事復謁聖墓  
循撫松栢儀型在望優乎至德之親人也朕忝作君啓  
牖下民深惟夫子師道所建百王治理備焉舍是而圖  
邳隆曷所依據哉因勒文於石彰朕尊崇聖教以承天

治民之意系以辭曰

遐哉三五維辟之式於皇尼山師道允植天畀木鐸覺  
彼羣生百行以正六籍以明賢邁唐虞聖則河洛綏和  
動來文博禮約性天峻極倫教孔彰學昌洙泗統歸素  
王炎漢崇儒少牢用饗厥後賢君高山是仰予懷至聖  
蒞彼東方音徽云邈道德彌光鬱鬱瑩林峨峨祠殿企  
慕安窮美牆如見泰岱匪高東海匪深敬揚懿軌終古  
式欽

孟子廟碑

自王迹熄於春秋聖人之道或幾於泯滅卒之晦而復明歷千百世而不敝者特有孔子也孔子沒百有餘年寢假及於戰國楊墨塞路禍尤烈於曩時子輿氏起而闢之於是天下之人始知誦法孔子率由仁義斯道之有傳至於今賴之是以後世學者如韓愈蘇軾之徒咸推其功以配大禹而閔洛之儒咸尊為正學之宗傳烏虜盛已夫洪水之禍止於人身已爾楊墨之禍隱然直

中於人心不有孟子使楊墨濫觴於前釋老推波於後後之人雖欲從千載之下探尼山之遺緒其孰從而求之因推述厥義刻文於石俾揭於鄒之廟其文曰

尼聖既往賈矣音微後百餘歲聖緒寢微尚異實繁楊墨競煽陷溺之禍酷於昏墊惟子輿氏距跂放淫以承先聖以正人心述舜稱堯私淑孔子正學修明百世以俟不有是者斯道孰傳宇宙晦霧萬物狂悖我讀其書曰仁曰義遺澤未湮聞風可企嶽嶽亞聖巖巖泰山功



邁禹稷德參孔顏刻石茲文於祠之下誦烈颺休用告  
來者

聖祖仁皇帝御製文集卷二十三

欽定四庫全書

聖祖仁皇帝御製文集卷二十四目錄

頌

福陵頌 并序

昭陵頌 并序

孝陵頌 并序

大德景福頌 并序

[illegible]

欽定四庫全書

聖祖仁皇帝御製文集卷二十四

頌

福陵頌 并序

惟

上帝鑒觀下民誕昇神聖俾立君極以開闢草昧垂統  
億祀非甚盛德曷克應天順人而締造鴻業焉我

太祖高皇帝聰明睿知本於性生英武勇略迥不世出

故能躬著戎衣手提尺劍而疆宇日拓丕受景命顯庸  
東國騰威區夏雖太王之居岐翦商文王之江漢歸化  
未足方斯赫濯也予小子仰荷

列聖丕基統御萬國版章式廓隆古圖籍所莫覲矣然  
上跡

聖祖當日一成一旅櫛沐風雨斬刈荆棘張彼撻伐順  
者綏之逆者殄之統壹羣部建元正位國始立焉旣乃  
鞠旅徂征遐邇警服悉臣悉氓遂定鼎遼土而王業愈

光顯矣於戲盛哉惟

天生

聖惟

聖奉

天我

太祖創業之艱如彼而垂統之遠如此豈非天實授之  
而克荷厥休者哉予小子景仰謨烈奚敢忘紹述焉爰  
作頌曰

於昭

太祖誕膺景命允武允文體協仁聖天罰恭行赫然割  
正啓疆東海聿懷兆姓戰罔弗克威略如神德罔弗冒  
桀鰲咸臣受籙踐祚帝厯鼎新建官立制王路丕遵爰  
誓六師濯征明國以少擊衆羣醜胥殛長驅鐵嶺墮彼  
阨塞芒芒遼瀋隸我版域會極歸極乃建皇都大統肇  
跡炳垂帝謨在昔湯文蹶起一隅先聖後聖同軌合符  
皇哉龍興山川孔固



寢園崔嵬風雲盤互玉衣鐵馬百神衛護仰頌

先猷萬年錫祚

昭陵頌并序

國家垂厯服無疆之休類必有神聖開天肇興王業又  
必有神聖繼體式廓鴻基故能經綸宇宙積功累仁保  
世滋大我

太宗文皇帝挺濬哲之資蘊欽明之德紹膺寶位繼前  
謨而光顯之外奮威武內修文教百度具舉臣民胥悅

於是南征則墮巖闕繞明都耀兵燕趙鞠旅齊魯投鞭  
渤海飲馬黃河六師安行莫我敢遏東征則誅貳綏服  
朝鮮納款列為屏藩西征則三十五部厥角歸命貢賁  
奉朔蓋其允塞之猷桓撥之略赫濯於覆載間矣乃若  
惇九族惠元元郊圻以飭爵秩以班賞善宥過優禮勲  
舊求賢之思若渴崇儒之化丕隆雖古帝德廣運曷以  
加焉當是時義問炳燦仁風翔洽一統之規已裕矣猶  
畫境息民俟天休命於戲皇哉盛哉昔殷祥長發而湯

受之周室本支百世而文啓之若我

皇祖詎有遜美予小子嗣承丕緒撫安海寓以弘億萬  
禩之業紹述

祖德敬揚

先烈廼作頌曰

猗歟

皇祖克配彼

天光被四表仁汜八埏旣受共球神人攸主至治洋洋

弘謨訐訐桓哉七萃撻彼南疆匪疚匪棘兆人是匡徂  
征朝鮮爰渡鴨綠聲其攜貳綏其臣屬西荒千帳慕義  
同歸鐘鼓始振稽顙莫違至化覃敷函夏率育

天錫大寶景命有僕曰崇儒雅曰叙彝倫五章五用式  
迪俊民法度孔昭典常聿正媿美唐虞惟后克聖建中  
錫極詒我後昆皇皇大烈億祀彌尊肅望

山陵光華燁赫永言垂裕敬承靡斁

孝陵頌并序

蓋聞乾苞合契誕開長發之祥坤極毓靈永錫丕承之祚是以溯若水者誦顓頊之遺風登穀林者仰陶唐之餘澤莫不焯煌瑤牒炳爍珍符垂裕萬年流輝千載況乎當紹庭之日篤繼緒之思覃厚旣深覲揚滋切者乎我

皇考世祖章皇帝躬上聖之資啓維新之運宅中圖治保大定功舞干羽於兩階武昭文洽受共球於萬國遠至邇安峻德弘勲懿綱釀化至矣盛矣蔑以加矣肆予

一人嗣膺歷服方厯纂承之志彌深對越之心展謁

孝陵式瞻

園寢驚秋霜之始肅感春露之初濡光烈宣昭僉在見  
聞之內聲靈赫濯儼然陟降之前敬申繼述之情用廣  
敷陳之義爰拜手稽首而為頌曰

奕奕

孝陵蔥蔥佳靄多沛艾兮土脈淳和地靈清泰無塵磕  
兮五峰屏嶂三臺襟帶拱內外兮王氣如龍紫雲如蓋

紛來會兮猗歟

皇考陟降往來常在茲兮桂宮蘭殿繡碣文棖鬱參差  
兮鸞旂羽葆蒼蚪翠螭何歲蕤兮太和充溢景光淑熹  
亘四維兮琬琰在房圖球在序神所處兮金穗宵明玉  
衣晨舉永終古兮如接形聲如聆笑語我

聖父兮以妥以侑式垂懿舉昭來許兮我寵受之蕃衍  
鴻龐命溥將兮紹聞衣德繼序其則不愆忘兮凝休篤  
祐錫祉儲祥一人慶兮本支百世詒燕無疆祚靈長兮

大德景福頌并序

恭惟

聖祖母太皇太后躬備聖德

天錫純禧作配我

太宗文皇帝內廷翼贊肇造邦家誕育我

世祖章皇帝瑞應昌期撫綏函夏爰及小子纘承基緒

十有六載

思勤鞠育莫罄名言訓迪弘深難於殫述蓋



皇天眷佑我國家篤生

聖哲母儀後昆以為積慶凝祥之本猗歟盛哉啓百代之鴻圖樹千秋之懿則備累朝之孝養極四海之尊親德福兼隆康寧壽考曠古以來未有若我

太皇太后之盛者也臣日侍

慈闈欽瞻

懿範戴天地而莫能窮其高厚仰日月而莫能繪其光華顧念罔極深恩敢辭固陋敬颺萬一冀展微忱爰拜

手稽首而獻頌曰

天開景祚運際龐鴻

太祖啓宇嗣以

太宗文武神聖帝業光融惟

聖祖母大德媿隆純仁至孝克儉克恭茂修內治佐厥  
成功迨我

皇考誕膺天祿冲睿承乾海宇賓服允賴

聖慈劬勞顧復式訓寬仁垂型雍肅德洽萬邦恩流九

族以天下養奄受多福越予小子大業祇承帡幪啓佑  
仰戴

慈寧仁如天覆靜比坤貞弘綱大政懿訓是程勉以懷  
保惕以勵精孫謀宏遠壺教光亨溥愛宣慈秉禮度義  
端莊誠一萬善咸備穆處深宮含弘庶類德化殷流惠  
風遐暨

顯號鴻名昭垂後嗣

寶冊騰輝瑤編紀瑞

聖人之配誕生

聖人古惟太如今茲比倫壽祺正茂休祉駢臻本支百  
世子孫繩振慶延家國光被臣民億萬斯年景祐常新

聖祖仁皇帝御製文集卷二十四

欽定四庫全書

聖祖仁皇帝御製文集卷二十五目錄

贊

至聖先師孔子贊

并序

顏子贊

曾子贊

子思子贊

孟子贊

老子出關圖贊

畫馬贊

陳所翁畫龍贊

筆贊

箴

講官箴

督撫箴

祭酒箴

給事中箴

御史箴

守令箴

銘

硯銘

鼎銘

屏風銘

烏鎗銘

烏鎗銘

弩銘

弩銘



欽定四庫全書

聖祖仁皇帝御製文集卷二十五

贊

至聖先師孔子贊

并序

蓋自三才建而天地不居其功一中傳而聖人代宣其  
蘊有行道之聖得位以綏猷有明道之聖立言以垂憲  
此正學所以常明人心所以不泯也粵稽往緒仰溯前  
徽堯舜禹湯文武達而在上兼君師之寄行道之聖人

也孔子不得位窮而在下秉刪述之權明道之聖人也  
行道者勲業炳於一朝明道者教思周於百世堯舜文  
武之後不有孔子則學術紛淆仁義湮塞斯道之失傳  
也久矣後之人而欲探二帝三王之心法以為治國平  
天下之準其奚所取衷焉然則孔子之為萬古一人也  
審矣朕巡省東國謁祀闕里景企滋深敬搦筆而為之  
贊曰

清濁有氣剛柔有質聖人參之人極以立行著習察舍

道莫由惟皇建極惟后綏猷作君作師垂統萬古曰惟  
堯舜禹湯文武五百餘歲至聖挺生聲金振玉集厥大  
成序書刪詩定禮正樂旣窮象繫亦嚴筆削上紹往緒  
下示來型道不終晦秩然大經百家紛紜殊途異趣日  
月無踰美牆可晤孔子之道惟中與庸此心此理千聖  
所同孔子之德仁義中正秉彝之好根本天性庶幾夙  
夜勗哉令圖溯源洙泗景躅唐虞載歷庭除式觀禮器  
濡毫仰贊心焉遐企百世而上以聖為歸百世而下以

聖為師非師夫子惟師於道統天御世惟道為寶泰山  
巖巖東海泱泱牆高萬仞夫子之堂孰窺其藩孰窺其  
徑道不遠人克念作聖

顏子贊

聖道早聞天資獨粹約禮博文不遷不貳一善服膺萬  
德來萃能化而齊其樂一致禮樂四代治法兼備用行  
舍藏王佐之器

曾子贊

洙泗之傳魯以得之一貫曰唯聖學在茲明德新民止  
善為期格致誠正均平以推至德要道百行所基纂承  
統緒修明訓辭

子思子贊

於穆天命道之大原靜養動察庸德庸言以育萬物以  
贊乾坤九經三重大法是存篤恭慎獨成德之門卷之  
藏密擴之無垠

孟子贊

哲人既萎楊墨昌熾子輿闢之曰仁曰義性善獨聞知  
言養氣道稱堯舜學屏功利煌煌七篇並垂六藝孔學  
攸傳禹功作配

老子出關圖贊

趙孟頫畫

修身養壽古隱君子掌藏室書為柱下史清靜自正是  
其大旨宗周式微羣雄龍戰逝將去此八荒周徧徐甲  
負笥青牛服鞵闕尹望氣物色候門和光抱一曰擊道  
存少留著書虛無是論元文既宣解人亦寡入於無垠

廣莫之野去住兩忘物無害者吳興學士繪事肖神既  
寫道德又貌僊真高古肅穆髣髴伊人神龍見首變化  
莫同乘雲上下孰知其終至聖所名斯言我從

畫馬贊

大梁韓幹古之筆精寫此駿足千載如生紅光耀脣紫  
豔承睫削玉霜蹄團花霧鬣乾維叶象房宿効形體中  
儀式法合圖經鵠起鸞停風焱電駛不遇九方孰致千  
里我聞在昔文德誕敷飛黃服皂驤褭駕車覽物心怡

披圖神往曾是權奇曾是倣儻南浮滇水北絕玉山利  
茲地用充我天閑

陳所翁畫龍贊

雲龍駢駢衆物之靈暫行萬里少息千齡飛潛應候變  
化無形乾爻九五取象君德時乘六位周流八極雲行  
雨施品彙生殖爰有哲匠絹素經營僧繇舐筆董羽研  
精蜿蜒夭矯巧若天成嗟此好手聲價超越得水能飛  
點睛斯活波濤騰涌煙霧滅沒遠宅江海亦遊名都夏



王遠駕虞舜受圖命官紀年用表禎符德至泉水神物  
乃下馴擾可恭奚俟摹寫祕藏斯卷以驗真者

筆贊

文犀之植中山之毫絢以藻采潤以蘭膏翡翠其牀玉  
璧其匣濡之隄靡翰染八法若墳若典若史若經奉以  
撰述逸於汗青時維休昌誕敷文德弓矢載櫜彤管競  
飭遐哉八表車書其同結繩云邈永資爾功

箴

講官箴

予企至道覃思簡編朝夕討習禮茂講筵詩人有云顯  
示德行啓沃惟賢庶幾金鏡尔列詞苑峨峨在廷細旃  
廣厦論史談經體之行之朕躬是力載獻載替尔職宜  
飭毋務勦說毋苟雷同毋繆於正毋悖厥中在昔大儒  
稱先則古臯夔是師言規行矩誼貴翼勵先正其心尔  
苟勿欺吐辭足欽詎曰名義可以塗飾詎曰聖賢可以  
蠡測闕闕濂洛炳矣心傳撰述大旨庠序宗焉用昭儒

修用弘教澤尔其勉茲尚無攸斁

督撫箴

芒芒方域分理需人岳牧之選實惟重臣寄以封疆千里而遠地則星羅令猶風偃控攝文武統馭官司繩違糾慢宣德布慈廉善是旌貪黷毋宥小青是矜吞舟毋漏彼昏而墨日削月朘或市徇縱以恣撓虔澤不下殫民隱罔恤政廼不和為時蝨賊曾是源濁而流則清曾是表正而景則傾職汝之由是曰曠墜軫我元元保釐

奚賴天命天討我不敢私勛哉有位敬聽箴辭

祭酒箴

予敷文德式禮辟雍允維祭酒多士攸宗在昔有虞命  
夔教胄洎於成周升彼孝秀撫今區夏遵路陳常海域  
遣子願齒膠庠尔長廼司表率匪易木繩斯直玉琢斯  
器烝烝譽髦尔儀是型濟濟橋門尔訓是聆惟廉持躬  
惟慎率屬佻達其懲戒董其勛皇矣謨典如鏗金鋪闡  
揚罔盡則倣奚從毋矜而華導之誠正毋詭而趨範之

孔孟王化丕盛視乎成均苟隳厥職曷明人倫儒行克  
臧汝績迺效黽勉詔媿助宣聲教

給事中箴

咨爾給事實專言職厥地惟親禁闥之側入納奏劄出  
奉綸章清勤斯稱敬慎斯臧六曹有失汝其正之百僚  
有邪汝其諍之予懷邦直謇諤足多庶茲有位胥用濯  
磨罔逞已私小心乃集罔見近利不阿乃立勿流於黨  
而苟為同勿懼於威而戾夫公道貴毋欺論尚執要棄

佞勵忠令聞始劾尔之無忝寵錫是承尔之弗率謹罰  
是膺憲典丕昭視尔賢否靖獻克誠國恩孔厚毋曰秩  
卑補闕拾遺夙夜匪懈勗哉攸司

御史箴

柱下一星列曜太紫其象維何今也御史淬厲風裁檢  
齊霜紀下飭官方上參國是肅肅柏府峨峨豸冠其職  
清要簪筆朝端百司有闕是繩是彈民澤或壅是宣是  
彈汝不自克何以懲墨汝不自正何以糾慝毋畏強禦

毋縱殘賊庶幾夙夜邦之司直昔之法吏正色臺中為  
我耳目効彼股肱馳聲簡冊流美無窮敬之敬之罔不  
克恭

守令箴

五等封建古今異宜郡縣之制百王同規壤地磐牙提  
封綦峙大者一州小則百里有社有稷有民有人守令  
何職職茲拊循勸農課桑宣條設教偃風以德從星惟  
好毋營筐篚毋急簿書惴惴之治歲計有餘莫高匪天

而卑其聽莫愚匪民而智其性民不可掩天不可欺一  
之不慎而戚自詒稽古治效嘉禾瑞麥勉能其官紹休  
前迹

銘

硯銘

鳳珠之姿龍尾之質雕焉琢焉登翰墨室如珪之方桓  
信是率如璧之圓蒲穀是匹或巉而巖芙蓉翠篠或潤  
而泉玉膏湓湓腹坦而容目仰而出外斂其華中堅其



實端溪伊何縝密以栗銅臺伊何澤黜以泰靜兮不佻  
動兮不軼研之隄靡運之不律磨礪性情發揮道術厥  
功懋哉允惟迪吉

鼎銘

庖犧作鼎尚象太乙神禹鑄金九鼎萃律皇哉鼎義易  
稱元吉吳濟以離烹飪何飮享帝養賢位命凝一初象  
維陰利其否出二克剛中是為有實陽居廼腹和而悔  
失苟或比陰覆餗莫恤厥鉉伊何金玉其質大德保之

守以無逸

屏風銘

維爾卓立巍然嚮離亦稱斧扆亦名罍愚動而有則靜而不欹端廉方直藩翰攸宜繄昔漢殿圖畫載披永言好德納彼良規洎乎唐室十漸用裨大書作障釋茲念茲予懷上聖治企無為南面聽政垂拱於斯云何敢逸廣列訓辭擬諸士史以獻典詩

烏鎗銘

範金為質石火中蘊體約用弘宣威制勝潛發其機愼  
持其柄摧堅擊遠聲光震迅翼我武功式臻耆定

烏鎗銘

一器也體類戈戟功逾矢礮當機迅發則星馳而電激  
落雲霄之勁翮殲林莽之軼材洵武功之良具更無所  
施而不宜

弩銘

珍木自南其理則直省括有度用以觀德

弩銘

夾也柔克唐也剛克不剛不柔茲器維則

聖祖仁皇帝御製文集卷二十五

欽定四庫全書

聖祖仁皇帝御製文集卷二十六目錄

雜著

講筵緒論計四十六則



欽定四庫全書

聖祖仁皇帝御製文集卷二十六

雜著

講筵緒論

計四十六則

大學一書言明德新民誠修己治人之要道也千古君  
道之隆莫過於堯舜觀克明峻德以親九族平章百姓  
協和萬邦此正大學修身教家由家及國由國及天下  
之理然必己德既明而後可推以及人故大學以慎德

為本

古人有言反經合道謂之權先儒已有論其非者天下止有一經常不易之理權衡輕重隨時斟酌而不失乎經常之理此卽所謂權也豈有反經而可以行權者乎古稱慶都感赤龍之祥孕十有四月生堯此等事先儒常疑之正孟子所謂盡信書不如無書之意也蓋聖人不語怪以垂戒於世而後人猶有矯誣上天侈言祥瑞之事况敢從而啓之乎



前代治河皆以為宜疏決而放之海則永無河患但今運道自淮以北必由黃河一百八十里而後達於運河與古形勢不同則古說亦何可盡行也

論才則必以德為本故德勝才謂之君子才勝德謂之小人司馬光之言洵為篤論

寬弘容納正所以開敢言之路而使人得盡其言舜之大智全在於此

從來有生知有學知有困知而及其成功則一未有下

學既久而不可以上達者但功夫固不可躡等而進尤不可半途而止為山九仞功虧一簣此正謂半途而廢者也

孟子一書言仁義最為親切最為詳盡為功於後學不淺

中庸言至誠至聖贊化育參天地制度考文之盛聲名洋溢之遠可謂費矣究竟上天之載無聲無臭何其隱也中庸之旨大約不外於費隱

前代所造渾天儀未嘗不善但世久法湮交食錯亂不能枚舉曾講究古法新法故知其槩古法推算冬至及日月交食多用積數因數多奇零盈縮虛實之難明不能合於天新法多用餘數及濛氣差之類又驗之於測景故較之古法僅能與天象相合

咨詢固宜廣攬而衆好之必察焉衆惡之必察焉又不可不詳加審辨也

唐人詩命意高遠用事清新吟詠再三意味不窮近代

人詩雖工然英華外露終乏唐人深厚雄渾之氣

書謂刑期于無刑古來任人而不任法故常原情輕重未嘗膠於一定所以宥過無大刑故無小後世人情巧偽日滋輕重大小不得不斷之一定之法此亦勢之不得已也

大禹謨帝德罔愆一節常涵泳理會其贊帝舜如天之仁該括已盡如與其殺不辜寧失不經二語覺聖人慈愛惻怛之意千載如見

儉以成廉侈以致貪此乃理勢之必然者

國家刑法之制原非得已然懲警奸慝又不可無每於刑法必反覆祥慎期於至當未嘗一事有所輕忽

人臣進言固當直切無隱人君納諫尤當虛懷悅從若勉聽其言後復厭棄其人則人懷顧忌不敢盡言矣每閱唐太宗魏徵之事歎君臣遇合之際千古為難魏徵對太宗之言臣願為良臣毋為忠臣嘗思忠良原無二理惟在人君善處之以成其始終耳

朕每有巡幸卽留心訪察民間利弊政治得失如河工一事屢年衝決雖由水勢泛溢亦間有不肖小吏利於興工往往為此旋修旋決遂成河患若竟聽之入海則運道淤塞不通近簡命河臣董理辨其水勢疏其故道嚴察下吏重其考成果能實心行之庶或一勞永逸

閱禹貢註中所釋九河諸說紛紜亦無確見大約書史經秦火以來上古事已難於考証後人以意求之豈能  
昭合

曩巡幸薊州盤山時侍臣奏盤山佛寺有佛骨佛牙因  
言佛牙闊二寸許長過之比諭之曰古所謂聖賢皆與  
人無異故學堯則可至於堯學舜則可至於舜能忠則  
為忠臣能孝則為孝子此聖賢所以可貴也若尔所言  
佛牙之大如此則佛本天地間奇異之人生來便不可  
學又何用尊奉為哉言者無以對

雍州西北之地古稱沙漠向來人跡罕通是以紀載所  
傳多未詳確今皆奉車書往來故知之獨詳大約甘肅

之西從長城外至四川松潘止十餘日可達導江雖始  
於岷山其實江源尚在茂州之西至岷山始大耳黃河  
自積石北流為河套之地至延安府入陝西境其地亦  
不甚遠今阿爾多斯固山之地卽是也

言治河者謂宜順其入海之性不宜障塞以與之爭此  
但言其理耳今河決在七里溝去海止四十餘里若聽  
其順流入海既可勞人功亦且永無河患豈不甚便  
但淮以北二百里之運道遂成枯渠國計所關故不得



不使其迂廻而入淮河之故道此由時勢與古不同也  
古人所謂民可近不可下者卽孟子所謂民為貴之意  
蓋天視自我民視天聽自我民聽斯豈非邦本之謂乎  
臨民以主敬為本昔人有言一念不敬或貽四海之憂  
一日不敬或以致千百年之患禮記首言毋不敬五子  
之歌始終皆言敬慎大抵誠與敬千聖相傳之學不越  
乎此

今人沿於明季陋習積漸日深清操潔已難言之矣職

守亦多至曠怠罕能恪勤朝廷良法美意往往施行未久卽為叢弊之地常欲化導轉移每患積習之難去也書言推亡固存此正中庸所云因材而篤栽培傾覆之意王者體天心以為賞罰正宜如是

人君以天下之耳目為耳目以天下之心思為心思何患聞見之不廣觀舜以好問好察而稱大智則知自用則小者正與之相反矣

書中義理原自完備惟在詮解明白加以反覆玩味自

然旨趣無窮若多為援引反致書理不能豁然矣

嘗觀古來帝王如唐虞之都俞吁咈唐太宗之聽言納諫君臣上下如家人父子情誼浹洽故能陳善閉邪各盡所懷登於至治明朝末世君臣隔越以致四方疾苦生民利弊無由上聞我

太祖

太宗

世祖相傳以來上下一心滿漢文武皆為一體情誼常

令周通隱微無有間隔一遊一豫體恤民情創作艱難立萬世不易之法朕雖涼德上慕前王之盛事凜遵

祖宗之家法思與天下賢才共圖治理常以家人父子之誼相待臣僚罔不兢業以前代為明鑒也

人君出入警蹕固宜嚴肅朕見明朝之君高居深宮過於安逸凡郊祀偶出所乘之輦皆鐵絲作幃以防不測人君臨御天下以四海為一家當使遐邇上下傾心歸慕若刀矢可加於輦幄之中則人心離貳雖鐵壁何益

故古來賢聖之君尚德不尚威也

詩以吟詠性靈如唐太宗諸篇未有不以天下黎民為念者

歐陽修憎蒼蠅賦題雖小喻讒人亂國意極深長每喜讀之

君臣之際當使情誼浹洽則下志得以上通孔子所謂君使臣以禮孟子所謂君之視臣如手足皆此義也

書云德無常師主善為師善無常主協于克一此節大

旨不外博約之義嘗閱直解有云聖人之取善如冶人之鍊金或取之於沙或取之於水曾無定在所謂德無常師也迨既鎔鍊之後沙者忘其為沙水者忘其為水但見其為精純之金所謂協于克一也此喻可謂明切世風澆漓人皆不能潔已自愛故今日求操守廉介之人甚難或僅能自守而其才不克有為當理繁治劇之時又苦於不能肆應可見人才之難也

昔人曾有論高宗以舊勞于外幼居民間當必久知傳

說之賢而思用之恐人未信而託為帝賚之言此論甚是蓋恐後人藉口神奇以開矯誣之漸也

端人正士當與之日親自有啓沃開陳之益此古人所以重朝夕之納諫也若小人日近則不覺其損而自損矣

講書以明理為要理既明則與古人之說無往不合此所謂一本散為萬殊萬殊歸於一本博約兼資之道也自幼讀書凡一字未明必加尋繹期無自欺不特讀書

為然治天下國家亦不外是也

書云惟黜學半此句有二說一說自學與教人功居其半一說教者之指授僅示以半其餘必待學者之自悟直解亦主後說註以其近於禪家解悟機鋒而闢之是也

異獸珍禽雖古人所不尚但西洋遠貢來京跋涉艱阻多歷歲月誠心慕化良為可嘉却之非柔遠之道故留畜上林非侈苑囿之觀也



讀書以有恒為主積累滋灌則義蘊日新每見人期效於旦夕常致精神誤用究歸無益也

嘗詳覽古人詩文造語精微才學兼到閱之似易倣之甚難故云讀書萬卷方能下筆有神更須善運古人於筆底化陳腐為清新斯為盡善

人君惟敬修其德以與天意相感孚不必指何事為何德之應總之和氣致祥乖氣致戾乃古今不易之恒理遇祥益謙遇災知儆乃人君應天之實事亦無時不致

其謹凜而已

通鑑前編所引諸說雖皆古人遺書但不若朱子綱目  
切要純正

古史中如黃帝鼎湖乘龍及周穆王宴於瑤池之事皆  
非正史所傳雖文章中嘗採用之不過資其華藻以新  
耳目其實不足信也

聖祖仁皇帝御製文集卷二十六

欽定四庫全書

聖祖仁皇帝御製文集卷二十七目錄

雜著

講筵緒論 計三十九則



欽定四庫全書

聖祖仁皇帝御製文集卷二十七

雜著

講筵緒論計三十九則

經學在於切實通明折衷諸說史學在於始末淹貫論  
定是非二者皆確有証據難於支離其說故必由積累  
之功涵泳之久較之詞章之學其難易固不同也

書云不役耳目百度惟貞孟子所謂耳目之官不思而

蔽於物物交物則引之而已正心思為耳目所役之意始為所引漸為所役勢有必然

康誥一篇言修德保民之要極為詳備如明德新民如保赤子惟命不于常等語大學多引用之今繹觀其訓諭諄切文詞古奧具見三代聖賢咨儆之意

書云要囚服念五六日至于旬時古人又稱再斯可矣若斷獄而至于旬時不決固慎重之意又恐獄久淹則易滋弊古人之意惟求其真知灼見而無疑獄之為難

也酒誥中數節似寬而實嚴正古人治世之微權也

近日小民蓄積匱乏一遇水旱遂爾捐瘠莫支幾填溝壑此皆豐稔之年粒米狼戾不能儲備之故也

古人常云三年耕必有一年之積九年耕必有三年之通此先事預防之至計所當講求於平日者

自古帝王崇信方士以求神仙者不可勝數如唐之憲宗武宗宣宗皆餌金石之藥以求壽考而不知反以自戕其生覆轍相尋而不知悔者昔人每深歎其愚此皆

未知無逸可以致壽聖賢原有切實可信之理也

朕自沖年臨御以來民間疾苦及貪吏弊竇留心體察  
已久其中情弊知之素矣但念君德莫大於有容治道  
莫尚於能寬故每事務存矜恕其有自罹於法者尚不  
忍置之重典誠恐近於苛刻有乖體恤臣工之至意也  
朝廷設立科道原寄以耳目重任邇來民生困苦朝廷  
之德澤不能下究科道各官於國計民生之大實心講  
究確切敷陳者寥寥無幾但將六部現行之事指摘紛



更希圖塞責冀免春秋年例處分其在朕前所奏皆若  
至廉至公及考其行事徇私自利者不可勝數所謂耳  
目之官風紀之任豈不大負厥職哉近日貪私之弊滿  
漢皆然滿人聚處京城形迹尚為易見漢人散處外郡  
往往有田宅彌連州縣挾其富厚之勢侵凌小民有司  
莫敢詰其非者科道官寧不知之而不聞有所糾叅舉  
發此皆言官溺職民生失所之由也

天下國家事莫不有大小重輕之勢故凡事當權衡折

衷必務從其大者重者今言官論事論人多指摘瑕疵但見及一偏而於大局全體所關不能審度其輕重卽如用兵之地督撫大吏職任至重至其製備鞍馬招募技勇激賞將士以及供餽官兵之費勢與內地不同儻復事事苛責恐墮其任事之心亦將何以展布其手足若兵興時用之兵休時遽黜之亦非所以慰勸勞臣且言官每事惟知推諉獨不思身在會議會推之列何不直陳於事前而必待推過於事後乎若其始或知而

不言或有所畏而不言皆非實心任事之道也

近日外吏可謂極難營私者固不免於糾叅卽有守正者又多不為人所容若因一時之彈劾而遽置於重典常恐有冤抑可矜故每兢兢然慎之

近日民生貧困家給人足之樂遠不及於古而風俗之奢靡日甚向嚴加禁止漸有規模自兵興以來稍弛其禁誠恐奉行不善或至擾民每思足民良法終無逾於此

嘗閱明宣宗實錄其奉事母后和敬有禮至今覽之猶足令人感慕朕常思先王以孝治天下故夫子稱至德要道莫加於此自唐宋以來人君往往疎於定省有經年不一見者獨不思朝夕承歡乃家庭之常禮且天倫至性何嘗以貴賤殊也

觀古廢興之際如夏商之桀紂周之幽厲所以墜失天命皆其自取後世亦有無大失德而隕覆其家國者如明之崇禎年間是也皆由其臣子背公徇私處言路者

變易是非淆亂可否曾無實心體國之人故至此耳  
嘗觀明仁宗宣宗時用法皆極寬平每思人君承天子  
民時育萬物自當以寬厚為根本始可成敦裕之治但  
不可過於縱弛所貴乎寬而有制耳

國家財賦出於民民力有限當思撙節愛養則國家常  
見其有餘每見明季諸君奢侈無度宮中服食及創造  
寺觀動至數十萬我朝崇尚樸質較之當時僅百之一  
二耳

嘗閱歷代史冊見開創之初及守成之主政簡治約上下臣民有所遵守末世君臣變亂成法朝夕紛更終無補益所謂天下本無事庸人自擾之耳

讀古人書當審其大義之所在所謂一以貫之也若其字句之間卽古人亦互有異同不必指摘辨駁以務求伸一已之說

聖人立言必渾淪切實後人求其說而過之每蹈虛寂之弊如釋老之書朕向亦曾流覽深知其虛幻無益於

政治易曰有君臣父子上下然後禮義有所措今釋道之教棄絕五倫根本既失其餘言論更何著落易曰天地之大德曰生天地人竝列而為三才今釋道之教生之理已絕是使三才且有時而窮此皆其大體錯謬不待辨而自明者也

自十二年用兵以來嘗取前人韜略武備等書閱之亦皆紙上談兵無益於事間有用符呪法術者尤屬不經我朝用兵自有調度且號令嚴明人人具有勇敢之氣

卽公卿士夫皆嫺戎馬故所向多能成功王者之師行之以正豈藉詭譎之術哉

嘗聞明宮闈中食御浩繁糜費不貲掖庭宮人幾至數千此皆可為深鑒朕思人主惟能自檢束恭謹則貴者益貴易所謂謙尊而光也若惟知侈縱反不覺其可貴矣我

祖宗相傳以此為訓朕恒用是凜凜

嘗聞明宮掖中人數甚多往往饑寒不恤鞭笞無度因



而致斃者亦甚衆小有營建動費鉅萬以本朝各宮計之尚不及當時妃嬪一宮所用之數本朝自入關定鼎以來外廷軍國之費與明代略相髣髴至宮中服用則三十六年之間尚不及當時一年所用之數蓋深念民力艱難國儲至重鑒彼侈靡之失弘昭敦樸之風古人云以一人治天下不以天下奉一人常思此言而不敢過也

祖宗以來累代相傳家法巡幸所至尤以勞費為慮我

太宗皇帝時每車駕所歷一切御用之物皆辦自宮中凡扈從之人絲毫不以擾民朕偶有巡幸惟守成憲誠恐駐蹕之地侵擾官民也

朕觀明世宗時廷臣爭執者莫如議禮一事然茲事折衷最難總由世宗為興獻王長子而興獻王又別無子嗣則世宗尊崇之議未為不當父子天性至恩恐難盡以義屈情也

履霜堅冰之喻可謂切至司馬光作通鑑託始於周以

三晉為諸侯而首發論斷極言防微杜漸之宜謹正聞  
明此爻之義千古治亂不能出其範圍後世如莽操之  
禍總皆由辨之不早耳

易理雖變化無窮而歷觀諸卦實有一貫之義大約審  
爻位之陰陽辨剛柔之中正而吉凶悔吝之數即不外  
乎此矣

易卦中大象言簡義該獨扼一篇之要如乾之自強不  
息坤之厚德載物蒙之果行育德師之容民畜衆全卦

之義蘊不越乎此尤當尋繹

三代井田之法寓兵於農正易所謂容民畜衆也自兵農既分勢難復合後世有欲於曠閑之壤倣古行井田之法者不惟無補於民正恐益滋煩擾天下事興一利不如去一弊之為愈增一事不如省一事之為得也

古車戰之法其廢已久由今思之不獨山林原隰難於馳驅卽平行之地亦不易用蓋一車之中左主射右主擊刺居中者主御或有一人不用命則勝負所關不小

此後世所以難行也

古人紀一事當觀其要旨所在如郭隗市駿之語見求士不可以不誠甘茂投杼之言見任人不可以不信此要領處尤不可不知也

久亂之民思治秦民日在湯火之中沛公入關首行寬大之政與父老約法三章民心既歸王業根本已定於此

漢高帝之待韓信不能如漢光武宋太祖之待功臣者

亦時勢不同也光武宋祖之時功臣歸於京師無握兵之權無震主之勢故保全之尚易韓信居楚兵柄在握天下初平人心未定高帝收之亦非得已總由所遇之時不同故所行亦各異耳

上古人心淳樸故鄉舉里選之法尚可以得真才後世人心日漓奔競日多若行古法於後世恐益滋其偽勢不得不以科舉為重耳

古有八議之法議賢議貴議功議能正以養大臣之廉

恥而不輕加以戮辱古云刑不上大夫固所以敬大臣亦所以尊重國體也

人臣之義以責難於君陳善閉邪為正叔孫通以為天子無過舉因而成之是欲飾其君以無過之名而反陷其君於文過之實宜為後世所譏也

後人謂陳平周勃之對呂后若能與王陵同持正論未必呂后之意不可回此蓋事後論人恒見其易耳呂后以悍鷙之威當稱制之日欲王諸呂氣凌羣臣此豈平

勃諸人口舌之所能爭乎是以君子論事又當觀其世也

嘗觀文帝以斷獄錢穀之數問宰相固為未當而陳平對以一切有主者亦為未善二者乃國家之大務宰相自宜振舉其綱領豈可云專責於所主乎

古者田以井授人皆自耕其田故室家殷阜而鮮失業遊食之民後世富室之田跨連阡陌貧民代為耕耨是以素無蓋藏一遇水旱遂致遊食四方流亡載道亦勢



使然也

朕自幼讀通鑑於張釋之論犯蹕盜環二事深喜其用法平允不媿廷尉之職

易之理雖無所不該下至士庶人皆可用而聖人立經垂訓之大義則為有天下國家者而發一辭一語皆可通於政治故繫辭有曰其稱名也小其取類也大此所以為萬世法程也

聖祖仁皇帝御製文集卷二十七

欽定四庫全書

聖祖仁皇帝御製文集卷二十八目錄

雜著

書座右四則

讀大學

讀性理大全

跋

皇考世祖章皇帝御書正大光明四字後

恭跋

世祖章皇帝御書陋室銘後

跋資政要覽

跋王右軍書曹娥碑真蹟

跋王羲之快雪時晴帖

跋董其昌書

跋董其昌書

跋董其昌書

書宋搢淳化閣帖後

訓學篇



欽定四庫全書

聖祖仁皇帝御製文集卷二十八

雜著

書座右四則

覽本之際不可說閒話不然差錯亦未可知如用人與  
刑名錢糧等事關係非小不可不慎

又

無一日不寫字無一日不看書義理自然貫通若畫地

自限豈登高行遠之至意哉

又

時當春令天氣融和萬物發生之時三農布種之日

又

為學之道須功夫嚴密久之其理自昭一段自得之趣  
自不能已

讀大學

自古治道盛於唐虞而其所以為治之道即其所以為



學之功後世聖人紹明厥緒以詔來者雖渺然千百載  
其大義微言豈有殊指哉大學首言明德新民誠不異  
於堯典所言固可因以推論其符合之故而溯其所由  
致力之端矣堯典曰克明俊德以親九族九族既睦平  
章百姓百姓昭明協和萬邦黎民於變時雍大學之言  
明德新民曰格物致知誠意正心修身齊家治國平天  
下此所謂先聖後聖若合符節者歟其言克明俊德者  
統言之也猶大學言明明德也格物致知誠意正心修

身者分言之也而堯典闕然未明其義蓋嘗以是而求之書曰人心惟危道心惟微惟精惟一允執厥中則其所以致力之端不外是矣夫曰惟危曰惟微則辨之不可不早辨所貴致其知矣曰惟精則格物之謂也知之既極其明則守之貴極其誠曰惟一則誠意之謂也以至正心修身皆主於一而允執厥中之義以全繼此而家齊國治天下平胥於此受裁成焉孰謂十六字之心傳不可以括大學之全書歟朕於帝王修己治人之道

雖日加自勵而未之有得念大學所由致力之端而合之堯典以明其義云

讀性理大全

昔者堯舜以一中相授受禹湯文武周公繼之孔子又繼之祖述憲章大成以集於是言道者莫不折衷於孔子然孔子之言性與天道也雖子貢不得而聞況其下焉者乎孔子之後惟子與氏首揚性善之旨而仁義充塞其道不行漢之諸儒抱其遺經以誦法孔子然僅窮

六經之義未聞性道之傳也若夫荀卿之言性惡而理  
偽揚雄之言性善惡混修其善而為善人修其惡而為  
惡人皆與聖人之旨陽合而陰悖雖韓愈之賢謂性有  
上中下三品之異亦似指氣質之性而言蓋未得為至  
論焉宋儒生於千載之下探索微言紹明墜緒性道之  
理始昭然大著於天下今讀其遺書如周子之學以誠  
為本以無欺主靜為要二程子之學以主敬致知為先  
朱子之學以窮理致知主一居敬為務皆深有得於性

天之旨可以上承夫孔子之傳者也其他諸儒造詣所至或見諸撰述或形諸論說悉能發明先聖之傳默契精微之蘊其有功於斯道非淺鮮矣朕備覽前括垂著之言手句讀而丹黃之雖研精極慮而於天人性命之旨詎能洞鑒本源歟

跋

皇考世祖章皇帝御書正大光明四字後

世祖章皇帝御筆書正大光明四字結構蒼秀超越古

今仰見

聖神文武精一執中發於揮毫之間光昭日月誠足婉  
美心傳朕罔不時為欽若敬摹勒石垂諸永久為子孫  
萬世法康熙十五年正月吉旦恭跋

恭跋

世祖章皇帝御書陋室銘後

我

皇考世祖章皇帝以上聖之資撫興王之運躬處九重

心周部屋蓋所謂養其民以致賢人矣至於親簡冊灑翰墨無時而不存此念也今恭覩

御筆書陋室銘一卷陋室者何山間水涯之居詩人之所謂考槃空谷也以萬乘之崇高不忘草茅之卑末於其所居若有取焉而親為書其辭則

聖心之所存於此亦可見焉康熙十六年九月四日萬善殿記

跋資政要覽

右資政要覽三卷

皇考世祖章皇帝機政餘暇博考羣籍萃精獵微

御製成編朕時勤披讀思仰先猷洪惟

皇考亶首出之資開太平之業所以承叙萬年裕我後  
嗣子孫無疆之祚者顯謨駿烈非寡昧之所能窺蓋體  
具狗齊德兼廣運因心以殂悉合於先程率性而行咸  
符乎天則過化存神之妙夫豈有資於效法也者而猶  
不廢夫學古之勤稽求之益豈非聖不自聖謙尊而光



者乎予小子欽承手澤念紹庭聞寶此遺文常作蘭臺  
之秘陳茲大訓即為西序之珍恭綴片詞用貽來葉云  
爾

跋王右軍書曹娥碑真蹟

曹娥碑相傳為晉右軍將軍王羲之得意書今覩真蹟  
筆勢清圓秀勁衆美兼備古來楷法之精未有與之匹  
者至今十餘年神采生動透出絹素之外朕萬幾餘暇  
披玩摹倣覺晉人風味宛在几案間因書數言識之

跋王羲之快雪時晴帖

晉右軍將軍王羲之真蹟存於世者尠矣快雪時晴嘗見刻之搨本中今覩其真蹟可為希代之寶藏之篋行不時觀閱恍接其人於千載以上也

跋董其昌書

米芾書天馬賦縱橫騫翥前無古人董其昌所臨既得其形似且極游行自如之妙朕嘗愛玩揭之屏風因題數語志真賞焉

跋董其昌書

朕觀昔人墨蹟華亭董其昌書畫錦堂記字體適媚於  
晉唐人之中獨出新意製以為屏列諸座右晨夕流覽  
寧不遠勝鏤金錯彩者歟

跋董其昌書

此屏裝潢既成尚餘縑素詹事沈荃亦華亭人素學其  
昌筆法題跋數語命之續書以志朕意時康熙壬戌二  
月八日

書宋搨淳化閣帖後

宋太宗皇帝嘗遣使購歷代君臣書蹟命侍書王著模刻法帖十卷搨以澄心堂紙李廷珪墨大臣登兩府者方得賜焉蓋其重之如此當時本不可多得況歷數百年之後乎此本乃賜翰林學士畢士安者神采煥發波磔明潤漢晉以來翰墨風規宛然猶在者尚賴此帖之存也朕幾政餘閒啟帙披卷如晤往昔心意融洽洵可寶而藏之也

訓學篇

皇初之會惠浸萌生澤及翔泳要其淳風沕穆難得而  
稱焉若夫上體乾揆俯育民物尼聖尚嘉之以冠德表  
治炳煥於典謨者莫崇乎陶唐有虞氏之為君也其時  
肇命中天函光始曜化神通變運啟文明而以禹皋稷  
契夔龍數賢聖為之臣亮天工熙帝載矣乃猶君臣咨  
嗟動色相儆勞謙恭己兢兢業業休哉帝者之上儀百  
王之芳軌也自茲以還或與治同道或與亂同歸未有

不原於敬怠之殊途積漸為安危之異轍者朕研精經  
籍逖覽往事念欽若之不易天位之維艱冲齡踐祚遂  
以安生民利天下為心厥後三逆之亂勞我師徒朕於  
此時憫念吾民罹此荼毒日昃而食中宵不寐階籤警  
夜軍書刺閨或已就枕披衣而興坐遽達旦凡攻守之  
難易機宜之遲速地形之險平饋餉之盈詘間諜之虛  
實物情之真偽羣下之勞苦功能之高下罔不博稽獨  
運惕若有遺用是四征不憚跼蹐剗膊草薶禽獮殲厥

醜類底於廓清茲五年矣四方無事邊境寧謐風行海  
表萬里來庭朕固涼德邁茲嘉會可不謂難得之時哉  
向使蒙業而安宴然以處三逆者尾大不掉蔓滋難圖  
或久而不發發至於大如火燎原不可撲滅乃欲使成  
壘壤境之間豈云黎烝耳不聞鳴鏑目不覩金草士旅  
無暴露之憂間井無騷騷之患其可得乎又況能使六  
合怡怡羣生就理永無跋盪之虞長有恬熙之象乎今  
天下既平矣公卿大夫方伯連帥羣有司在官者可以

少息其肩矣孔子繫易曰黃帝堯舜垂衣裳而天下治  
又稱舜無為而治比自武功耆定上下恪勤興廢祛慝  
罔即於逸庶事漸康刑政幾於清簡雖不敢仰追無為  
之聖化繼自今以往公卿百寮退食自公將優游有餘  
日焉所謂難得之時者非耶朕嘗考漢唐治平之世有  
百官休沐之制有令節游宴之詔蘇軾亦謂士大夫捐  
親戚離墳墓宣力之餘亦欲取樂此人之至情諸臣際  
此休暇之時而有優游之適豈不甚愜於朕懷雖然難



得者時可幸也亦可惕然警也昔漢文帝之賢值承平之日賈生獨以為未安未治者蓋居安思危所以久安已治求治所以長治也朕又觀古先哲王以及名公卿賢士大夫無有不遜志於學者蓋立身之本政治之原莫尚乎學堯則欽明文思舜則濬哲文明立人君之極也禹宅揆契掌教皋陶明刑伯典禮夔典樂立人臣之極也凡能此者其惟學乎朕雖探索羣書積日彌年不自暇逸然而未有所得中心惻然曷敢企望勲華之績

諸臣舍臯夔將以何者為矩矱耶不寧惟是漢世三公  
九卿如倪寬公孫弘韋賢貢禹劉向蕭望之匡衡桓榮  
楊震之徒並以儒雅尊顯於朝廷凡國有大事則引經  
據義歸極於道故漢之政理最為近古逮於唐宋名臣  
如林咸本儒術發為事功即程顥程頤朱熹諸賢不得  
大用於其時而著書立說羽翼六經至今學者宗之為  
世坊表甚矣學之不可已也如此及是時百兩卿士翺  
翔乎詩書之苑囿斟酌乎道德之淵源體心踐行率其

子弟寧學而後仕毋仕而後學焉且夫農工商賈必世其業而士夫之子弟若一惰慢遂為平人間有出而仕者少或不學長無所知語及古今之事茫然如墮雲霧又或矜其私智不度卑陋如犢僨轅害斯大矣其不得仕者或飽食美衣冶游嬉戲忽忽過日一旦銷落泊如窮流可不念哉夫學以實本根資通達定經權也未知事親者觀古人之事親而知孝未知事君者觀古人之事君而知忠未知天下之務者觀古人之前言往行而

知守經達變由是作賓王家為國禎幹使振鷺之聲充  
庭鴻鸞之羽漸階詎弗美歟朕是以遐溯唐虞鋪觀歷  
代取君臣交儆之義以及修身教家之法而為之說云



聖祖仁皇帝御製文集卷二十八